

UKM duduki tangga 184 universiti terbaik dunia

KUALA LUMPUR 8 Jun - Universiti Kebangsaan Malaysia (UKM) menduduki tangga ke-184 carta universiti terbaik dunia mengikut Symonds (QS) QS-World University Ranking 2018/2019.

Naib Canselornya, Profesor Datuk Dr. Noor Azlan Ghazali berkata, kedudukan UKM meningkat 46 anak tangga dari kedudukan ke-230, tahun lalu.

"Kami berbangga dengan peningkatan kedudukan dalam QS World University Ranking yang merupakan penarafan utama global dalam mengukur kedudukan universiti berbanding universiti-universiti lain di dunia.

"UKM yakin pencapaian ini juga mencerminkan kecemerlangan universiti dalam konteks yang lebih menyeluruh, khususnya dalam menyumbang kepada matlamat pembangunan negara dan peningkatan kesejahteraan kehidupan masyarakat tempatan dan sejagat, bertepatan dengan aspirasi rakyat yang mendasari penubuhan universiti ini," katanya dalam sidang akhbar dekat sini, hari ini.

Noor Azlan juga menganggap



NOOR AZLAN GHAZALI (kiri) menunjukkan butiran kenaikan kedudukan penarafan global dan universiti pilihan di Malaysia kepada pengurus-pengurus kanan universiti di Kuala Lumpur, semalam. - UTUSAN/FAIRUZ IZYANA AYUB

peningkatan dalam penarafan tersebut sebagai hadiah manis menjelang usia 50 tahun UKM.

"Pengiktirafan ini dapat dilihat dengan peningkatan yang konsisten sepanjang empat tahun kebelakangan ini yang menyaksikan

UKM berada dalam kategori satu peratus universiti teratas dunia.

"Selain itu, pada awal tahun ini, dalam penilaian QS mengikut tujuh bidang subjek antaranya Senibina, Bahasa Inggeris, Pengajian Islam, Kejuruteraan Kimia

dan Awam, Pendidikan serta Polisi Sosial telah tersenarai dalam 100 teratas di dunia," katanya.

Noor Azlan menambah, kejayaan tersebut merupakan hasil kerjasama dan komitmen tinggi oleh semua warga UKM.